

**Immakkut angallatit angallatikullu umiarsualivinniittut peerneqartarnerat pillugu
Inatsisartut inatsisaat nr. 43, 23. november 2017-imeersoq**

Kapitali 1

Atuuffia nassuiaatillu

§ 1. Inatsisartut inatsisaat immakkut angallatinut angallatikunullu umiarsualivinniittunut, aammalu inuussutissarsiornermi nassiussanik sullissivittut, inunnit aalisakkanilluunniit tulaassivittut atorneqartartunut atuuppoq.

§ 2. Inatsisartut inatsisaat manna umiarsualivinnut nunami atortulersuutitalinnut makkununnga atuutinngilaq:

- 1) Sakkutuut Kalaallit Nunaanni suliaqarnerannut atatillugu taamaallaat Naalagaaffimmit atorneqartunut.
- 2) Aatsitassat pillugit inatsit naapertorlugu aatsitassanik misissueqqaarnissamut, ujarlersinnaanermut atuisinnaanermullu akuersissutinut ilaasunut.
- 3) Nunami orsussaarniarfinni illoqarfinnik nunaqarfinnillu pilersuineranut ilaasuni uulianik ikummatissanillu nuussisarnermut naatsorsuussanut atorneqartartunulluunniit.
- 4) Pituffimmi illersornissaqarfiup iluani inissisimasunut.

§ 3. Inatsisartut inatsisaat manna umiarsualivinnut nunami atortulersuutitalinnut sunngiffimmi siunertanut atorneqartartunut atuutinngilaq.

Imm. 2. Umiarsualivik atortulersuutit ilanngullugit inuussutissarsiornermi nassiussanik sullissivittut, inunnit imaluunniit aalisakkanik tulaassisarnermut atorneqartarpat tassungalu peqatigitillugu sunngiffimmi siunertanut atorneqartarpat, atuneq tamarmiusoq § 1-ip ataaniittutut isigineqassaaq.

§ 4. Inatsimmi matumani makku imatut paasineqassapput:

- 1) Immakkut angallatit: Immakkut angallatit suulluunniit, taakkununnga ilanngullugit timmeralaat sisoraataasallit (hydrofojlbadit), qaatsiartaatit, aqqartartut, prammit, umiatsiaaqqat, angallatit puttasut aamma sulliviit puttasut.
- 2) Angallatikut: Immakkut angallatit usigisaaluunniit navianartorsiortut annaaneqariaannaallu pillugit sunniutilimmik ikiunissamik qanoq iliornissamik piareersaasoqarsimatinnagu, immakkut angallatit kivisimasut tippussaasimasulluunniit, umiatsiat kivisimasut tippussaasimasulluunniit ilaat suulluunniit, taakkununnga ilanngullugit tissarlukut immakkut angallammiittut angallammiissimasulluunniit, pequtit immakkut angallatinut katanneqartut, sissarlukut, kivisimasut tissukartulluunniit.
- 3) Umiarsualiviit: Talittarfiit talittarfialiillu allat, nunami atortulersuutit umiarsualiviillu eqqaanni imaq ilanngullugu, taamaalilluni taaguut, umiarsualiviit pillugit Inatsisartut inatsisaat naapertorlugu umiarsualiviit pillugit Inatsisartut inatsisaanni imaluunniit maligassani qaqugukkulluunniit atuuttuni nassuiaasernerat atorlugu nassuiarneqarluni.

4) Umiarsualivinni Oqartussat: Naalakkersuisut imaluunniit kommunalbestyrelsi imaluunniit Naalakkersuisut imaluunniit kommunalbestyrelsip sumiiffimmi umiarsualivimmi Oqartussat umiarsualiviit pillugit Inatsisartut inatsisaat qaqugukkulluunniit atuuttoq naapertorlugu sumiiffinni umiarsualivinni oqartussat suliaakkernikuusaat imaluunniit umiarsualivinnik nunami atortussiat ilanngullugit sanaartornissamik, allilerinissamik, allanngortiterinissamik, atorneqarnerannik allanngortitsinissamik akuersissummik pigisaqartoq.

Kapitali 2

Peerneqartarnera nalunaaqutsiisarnerlu

§ 5. Umiarsualivinni Oqartussat umiarsualiviit tikinneqarsinnaanerat, ernumanngitsumik angallannissaq, allatut atuinnissaq aqutsinissarlunniit eqqarsaatigalugit, tamanna nalinginnaasumik immakkt angallanneq imaluunniit pisariaqartumik immikkorluinnaq pisoqarallarneq ilanngunnagit, immakkt angallatip angallatikulluunniit peerneqarnissaannik naleqquttumik piffissaqartitsillutik immakkt angallatit angallatikulluunniit umiarsuavilimmiittut pillugit akisussaasoq peqqusinnaavaat. Umiarsualivinni Oqartussat assinginik piumasaqaateqarlutik tissarlukut pequtilluunniit, tak. § 4, nr. 2, umiarsualivimmiittineqartut peerneqarnissaannik peqqusinnaapput.

Imm. 2. Immakkt angallammut angallatikumulluunniit akisussaasuusoq taassumaluunniit sumiinnera Umiarsualivinni Oqartussat ilisimanngippassuk, sivikinnerpaamik qaammatinik pingasunik sioqqutsilluni nuna tamakkerlugu aviisitigut inuttassarsiuinikkut aamma immakkt angallammi angallatikumiluunniit allagarsiinikkut nalunaaruteqartoqarsinnaappat peqqusisoqarsinnaavoq.

Imm. 3. Immakkt angallatip taassumaluunniit ilaata umiunissaa annertuumik ulorianaateqarpat, imaluunniit imaani isumannaallisaanermut umiarsualiviulluunniit atorneqarneranut nalinginnaasumut annertuumik ajoqutaappat, Umiarsualivimmi Oqartussaasut siumoortumik peqqusinertaqannngitsumik akisussaasuusullu akiligaanik immakkt angallat angallatikorluunniit peertissinnaavaat.

Imm. 4. Imm. 3 naapertorlugu aalajangiineq ajornartinnagu iliuseqarnerup naamassineqarneranut peqatigitillugu oqaasiinnaat atorlugit akisussaasuusumut nalunaarutigineqartassaaq, taassumalu imm. 1-2-p saneqqunneqarneranut tunngavilersuummik imaqassaaq. Tamatuma kingorna akisussaasuusoq aalajangiineq imm. 1-2-mik saneqqutsinissamut tunngavilersuutitaqartinneqartoq pillugu allakkatigut nalunaarfigineqarnissamik piumasaqarsinnaavoq. Tamanna pillugu piumasaqaat angallatip imm. 3 naapertorlugu peerneqarnissaa ullunik 14-inik sioqqullugu Umiarsualivimmi Oqartussanut saqqummiunneqassaaq.

Imm. 5. Immakkt angallammut angallatikumulluunniit akisussaasuusoq taassumaluunniit sumiinnera Umiarsualivinni Oqartussat ilisimanngippassuk, sivikinnerpaamik qaammatinik pingasunik sioqqutsilluni nuna tamakkerlugu aviisitigut imaluunniit immakkt angallammi angallatikumiluunniit allagarsiinikkut nalunaaruteqarnikkut peqqusisoqarsinnaavoq.

§ 6. Umiarsualivinni Oqartussat akisussaasup akiligassaanik immakkt angallat angallatikorluunniit isumagisinnaavaa:

- 1) immakkt angallat angallatikorluunniit isumagisinnaavaat,
- 2) immakkt angallat angallatikorluunniit umiarsualivimmut assigisaanulluunniit inississinnaavaat,
- 3) immakkt angallammi angallatikumiluunniit silataanilu pisariaqartumik nalunaaqutsiisinaapput,

4) isumannaatsumik immakkut angalasarneq isumannaatsuutinniarlugu, angallatip isumannaatsuunissaa avatangiisinillu ajoqusiinnginnissaq qulakkeerniarlugit immakkut angallat angallatikorluunniit pisariaqartunik atortulersinnaallugu il.il.

§ 7. Umiarsualivinni Oqartussat immakkut angallatip angallatikulluunniit § 5, imm. 1 aamma 3 aamma § 6. malillugit peerneqartut inissiivissaasa qulakkeernissaa pisussaaffigaat.

Kapitali 3

Peerneqartarnerat nalunaaruteqartarnerlu

§ 8. Naliliisarteq sumulluunniit attuumassuteqanngitsoq nalunaaruteqarput, immakkut angallat angallatikulluunniit naleqanngitsut imaluunniit nalingi tunisinermi aningaasartuutissatut missingerneqartut qulaakkaat, Umiarsualivinni Oqartussat immakkut angallat usingi orsussaalu imaluunniit angallatikoq akisussaasup akiligassaanik peersissinnaavaat.

Nalunaartarneq

§ 9. Umiarsualivinni Oqartussat immakkut angallatip angallatikulluunniit peeraangamikkit, tak. § 8, akisussaasooq piginnittussaataasutullu ilisimaneqartut tamaasa, immakkut angallatip angallatikulluunniit peerneqarnerani piginnaatitaaffeqartut pisussaaffeqartulluunniit kalluarneqartussatut ilimagineqartut eqqarsaatigalugit peerneqarnissaanik eqqarsaateqarneq pillugu allaganngorlugu nalunaarfigissavaat.

Imm. 2. Immakkut angallammut angallatikumulluunniit akisussaasusooq taassumaluunniit sumiinnera Umiarsualivinni Oqartussat ilisimanngippassuk, sivikinnerpaamik qaammatinik pingasunik sioqqutsilluni nuna tamakkerlugu aviisitigut inuttassarsiuinikkut aamma immakkut angallammi angallatikumiluunniit allagarsiinikkut nalunaaruteqartoqarsinnaappat peqqusisoqarsinnaavoq.

Imm. 3. Immakkut angallatip angallatikulluunniit peerneqarnissaanik aalajangiinerup Kalaallit Nunaanni Eqqartuussivimmu suliassanngortinneqarnissaanut piffissarititaq naatinnagu pisinnaangilaq, tak. § 12, imm. 2.

Kapitali 4

Pinngitsaaliissummik tunisineq

§ 10. Immakkut angallammut angallatikumulluunniit akisussaasup immakkut angallat peqqusinermi piffissarititatu aalajangerneqartup iluani piinngippagu, tak. § 5, Umiarsualivinni Oqartussat immakkut angallatip, taassuma usii orsussaalu imaluunniit angallatikup tamanut ammasumik kaattaassinikkut akisussaasullu akiligassaanik pinngitsaaliissummik tuniniinnerneqarnissaanik aalajangiisinnaapput.

Imm. 2. Akisussaasup taassumaluunniit sumiinnera Umiarsualivinni Akisussaasut ilimagippassuk, Umiarsualivinni Akisussaasut immakkut angallat angallatikorluunniit pillugu nuna tamakkerlugu aviisini qaammatinik pingasunik piffissaqartitsillutik inuttassarsiuereernikkut, immakkut angallatip, taassuma usii orsussaalu angallatikorluunniit akisussaasup akiligassaanik tamanut ammasumik kaattaassinikkut pinngitsaaliissummik tuniniarneqarnissaanik aalajangiisinnaapput.

Imm. 3. Umiarsualivinni Akisussaasut aalajangiineri, tak. imm. 1 aamma 2, eqqartuussisarneq pillugu inatsimmi pinngitsaaliissummik tunisisarnermut aalajangersakkat naapertorlugit piviusunngortinneqarsinnaapput.

Kapitali 5

Naammagittaalliortarneq pineqatissiinerillu

§ 11. Inatsisartut inatsisaat naapertorlugu aalajangiinerit Naalakkersuisunut naammagittaalliutigineqarsinnaapput.

Imm. 2. Imm. 1 tunngavigalugu naammagittaalliorsinnaatitaasut tassaapput pineqartut aalajangiinermit pisussaaffiligaasut imaluunniit aalajangiineri namminneerlutik allatigut soqutigisaqavissut.

Imm. 3. Naammagittaalliornissamut imaluunniit nuna tamakkerlugu aviisitigut inuttassarsiuussinissamut piffissarititaasoq tassaavoq aalajangiinerup naammagittaalliutigineqartup tigunerata kingorna sapaatit akunneri sisamat.

§ 12. Inatsisartut inatsisaat naapertorlugu Naalakkersuisut aalajangiineri Kalaallit Nunaanni Eqqartuussivimmumt suliarinnittussatut siullertut suliasannngortinneqarsinnaapput.

Imm. 2. Kalaallit Nunaanni Eqqartuussivimmumt aalajangiineri apuussinissaq, aalajangiinerup kingorna kingusinnerpaamik sapaatit akunnerisa sisamat qaangiunneranni pissaaq.

§ 13. § 5, imm. 1 aamma 2-mi peqqussummik unioqutitsinerit Kalaallit Nunaanni Pinerluttulerineq pillugu Inatsimmi malittarisassat naapertorlugit pineqaatissiinerimik akiliisitsinikkut kinguneqartinneqarsinnaapput.

Imm. 2. Inatsisartut inatsisaat imaluunniit malitassat Inatsisartut inatsisaat malillugu aalajangersarneqartut akileeqqusissummik aalajangiinissamik pisinnaatitsippata, inatsisitigut pisussaataasoq Kalaallit Nunaanni Pinerluttulerinermut inatsimmi malittarisassat malillugit akiliisinneqarsinnaavoq.

Imm. 3. Imm. 1 aamma 2 malillugit suliat Kalaallit Nunaanni Eqqartuussivimmumt suliaqartussatut siullertut suliakkiutigineqassapput.

Imm. 4. Akiliisitsissutit imm. 1-2 malillugit pineqaatissiissutigineqartut Nunatta Karsianut pisassannngortinneqassapput.

Kapitel 6

Atuutilersitsineq

§ 14. Inatsisartut inatsisaat ulloq 1. januar 2018 atuutilersinneqarpoq.

Imm. 2. Tassunga peqatigitillugu umiarsualivinni malittarisassaqaartitsineq pillugu Namminersornerullutik Oqartussat nalunaarutaanni nr. 1, 4. januar 2000-imeersumi § 17 atorunnaarsinneqarpoq.

Imm. 3. Umiarsualivinni malittarisassaqaartitsineq pillugu Namminersornerullutik Oqartussat nalunaarutaanni nr. 1, 4. januar 2000-imeersumi malittarisassat allat Inatsisartut inatsisaanni tassani allaniluunniit malittarisassat aalajangersakkat taarserneqarnissaasa atorunnaarsinneqarnissaasaluunniit

tungaanut atuutiinnassapput.

Namminersorlutik Oqartussat, ulloq 23. november 2017

Kim Kielsen